

Inatsisartut suleriaasianni § 33 naapertorlugu aalajangiiffigisassatut siunnersuut ataani pineqartoq matumuuna Naalakkersuisunit saqqummiunneqarpoq:

Sakkutuujusussaaneq pillugu inatsisip allanngorneratigut inatsisit aalajangersimasut Kalaallit Nunaannut atuutilernissaat pillugit kunngip peqqussutaatigut atuutilersinneqarnissaa Namminersorlutik Oqartussat akuersaarsinissaat pillugu Inatsisartut aalajangiiffigisassaat

(Nunanut Allanut Nukissiuteqarnermullu Naalakkersuisoq)

1. Peqqussutip imarisai

Peqqussummut missingiummi sakkutuujusussaanermut inatsimmut allannguutit marluk, Kalaallit Nunaannut peqqussummut ataatsimoortillugit atuutilersinnissaannik kissaatigineqartut ataatsimoortinneqarput.

Siullertut, peqqussummut missingiut upalungaarsimanermut inatsimmi, inatsit nr. 1054, 23. december 1992-imeersumi allannguutinik atuutilersitsivoq. Matumani innuttaasunik illersornissaqarfik annaassiniaanermut upalungaarsimanermik taaguuteqalersitsinerata kingunerisaanik allannguutit taamaallaat pineqarput.

Aappaattut, peqqussummut missingersuutitigut sakkutuujusussaaneq pillugu inatsisip allanngortinneqarnera pillugu inatsit nr. 1538, 18. december 2018-imeersoq Kalaallit Nunaannut atuuttussanngortinneqarpoq. Inatsisip allanngortinneqarnerata kingunerisaanik sakkutuujusussat ilaat ulloq 1. januar 2010 sioqqullugu sakkutuutut suliarortinneqarsimasut aammalu kingorna sakkutuujusussaataitanermut inatsimmi malittarisassat malillugit kinguartitsisimasut, atukkaminnut qanigisaasaluunniit atugaannut pingaaruteqarluinnartuusoq uppersarsinnaagunikku sakkutuujusussaajunnaarsinneqassapput. 2018-2023-mut illersornissaq pillugu isumaqatigiisummik tamanna piviusunngortitsineruvoq.

Naalagaaffeqatigiinnermi inatsisit sorliit pineqartunut atuuttuunersut apeqqutaatinnagit Illersornissaqarfimmi sakkutuujusussat tamarmik assigiisummik atugassaqaarnissaasa qulakkeernissaat Illersornissamut Ministereqarfiup pingaartippaa.

Tamanna tunngavigalugu sakkutuujusussaaneq pillugu inatsisip Kalaallit Nunaannut atuuttup iluarsaannissaa kissaatigineqartoq nalilerneqarpoq.

Danskit inatsisitigut allannguinerinut tunngatillugu Kalaallit Nunaanni pissutsit allannguiiffigineqanngillat.

2. Inatsisit atuuttut

Kunngip peqqussutaanut siunnersuut una sakkutuujusussaaneq pillugu inatsimmut Kalaallit Nunaannut atuuttumut allannguutinut marlunnut tunngavoq inatsisillu allanngorteqqinngikkaluarlugit atuutilersinneqarsinnaavoq. Sakkutuujusussaaneq pillugu inatsimmi allannguutit marluk tassaapput, inatsimmi nr. 1054, 23. december 1992-imeersumi § 72 aamma

inatsit nr. 1538, 18. december 2018-imeersoq, tamarmik peqqussutitigut piginnaatitsissummik imallit.

3. Aningaasaqarnikkut allaffissornikkullu pisortanut kingunissai

Soqanngilaq

4. Aningaasaqarnikkut allaffissornikkullu inuussutissarsiortunut kingunissai

Soqanngilaq

5. Avatangiisinut, pinngortitamut inuillu peqqissusiannut kingunissai

Soqanngilaq

6. Innuttaasunut kingunissai

Soqanngilaq

7. Kingunissat allat annertuut

Soqanngilaq

8. Oqartussanut kattuffinnullu tusarniaaneq

Siunnersuut piffissami 17. januar 2020-miit 26. februar 2020 ilanngullugu tusarniaaffigineqartunut tullinnguuttunut toqqaannartumik nassiunneqarpoq: Naalakkersuisut Siulittaasuata Naalakkersuisoqarfia, Pinngortitamut Avatangiisinullu Naalakkersuisoqarfik, Aningaasaqarnermut Naalakkersuisoqarfik, Ilinniartitaanermit, Kultureqarnermut Ilageeqarnermullu Naalakkersuisoqarfik, Inuussutissarsiornermut, Nukissiuuteqarnermut, Ilisimatusarnermut Suliffeqarnermullu Naalakkersuisoqarfik, Aatsitassanut Naalakkersuisoqarfik, Ineqarnermut Attaveqatigiinnermullu Naalakkersuisoqarfik, Aalisarnermut, Piniarnermut Nunalerinnermullu Naalakkersuisoqarfik, Peqqissutsimut Naalakkersuisoqarfik, Isumaginninnermut Inatsisinullu Atuutsitsinnermut Naalakkersuisoqarfik, Aningaasaqarnermut Sulisoqarnermullu Aqutsisoqarfik, Rigsombudsmandi, Inuit Pisinnaatitaaffiitut Institutti, Kalaallit Nunaanni Naligiissitaanissamut Siunnersuisoqatigiit, Kalaallit Nunaanni ICC, Sulisitsisut, Transparency Greenland, KNAPK, SIK, Kommune Kujalleq, Kommuneqarfik Sermersooq, Qeqqata Kommunia, Avannaata Kommunia, Kommune Qeqertalik.

Uku tusarniummut akissuteqaatinik nassiussippot: Inuussutissarsiornermut, Nukissiuuteqarnermut, Ilisimatusarnermut Suliffeqarnermullu Naalakkersuisoqarfik, Aatsitassanut Naalakkersuisoqarfik, Ineqarnermut Attaveqatigiinnermullu Naalakkersuisoqarfik, Peqqissutsimut Naalakkersuisoqarfik, Isumaginninnermut Inatsisinullu Atuutsitsinnermut Naalakkersuisoqarfik, Inuit Pisinnaatitaaffiitut Institutti, Kommune Kujalleq, Kommuneqarfik Sermersooq. Tusarniaanermi akissuteqaatit allannguinnissamut peqquteqarsimangillat imarisaanut oqaaseqaateqartoqarsimangimmat.

9. Inassuteqaat

Sakkutuujusussaneq pillugu inatsisip allangorneranut inatsisit aalajangersimasut Kalaallit Nunaannut atuutilernissai pillugit Inatsisartut akuersissasut Naalakkersuisunit inassutigineqarpoq.

Ilanngussat

- Sakkutuujusussaneq pillugu inatsimmi allannguutit Kalaallit Nunaannut atuutilernissaat pillugit kunngip peqqussutaa pillugu missingiutip eqikkarnera
- Sakkutuujusussaneq pillugu inatsimmi allannguutit Kalaallit Nunaannut atuutilernissaat pillugit kunngip peqqussutaa